

Ntaub Ntawv Xov Xwm Neeg Mob txog ntawm Remdesivir (Veklury®)

Tsab ntaub ntawv xov xwm no yog hais txog ib hom tshuaj hu ua remdesivir (Veklury®). Remdesivir raug siv kho kab mob coronavirus 2019 (COVID-19). Cov xov xwm no yog pab kom koj nkag siab cov txiaj ntsim uas yuav muaj tau thiab cov kev pheej hmoo uas yuav muaj tau ntawm hom tshuaj no.

Hais txog remdesivir

Remdesivir yog ib hom tshuaj kho mob uas siv los mus pab kho cov neeg pw hauv tsev kho mob uas muaj mob COVID-19. Hom tshuaj no tuaj yeem muab siv tau nrog lwm yam kev kho mob lossis hom kev kho mob no nkaus xwb, nce raws qhov hais tias tus neeg mob ntawd mob hnyav npaum li cas.

Remdesivir tseem tsis tau txais kev pom zoo puv ntwb los ntawm Koom Haum Saib Xyuas Khoom Noj thiab Tshuaj (FDA, Food and Drug Administration) hauv Teb Chaws Meskas vim nws tseem tab tom raug tshawb fawb tsis tau tiav. Li cas los xij, koom haum FDA yuav tso cai siv thaum uas tau ua tiav kev tshawb fawb ntau yam ntxiv. Sab Europe thiab Teb Chaws Zijpees los kuj siv remdesivir los mus kho COVID-19.

FDA tuaj yeem muab kev pom zoo thaum ti tes ti taw los mus siv cov tshuaj kho mob xws li remdesivir nyob rau lub sij hawm uas muaj xwm ti tes ti taw ntawm kev kho mob, xws li kev kis mob thooob ntuj ntawm COVID-19. FDA muab kev pom zoo raws kev ti tes ti taw thaum kev tshawb fawb xub thawj qhia tau hais tias ntxim li hom tshuaj kho mob ntawd nyab xeeb thiab tau txais txiaj ntsim zoo. Qhov kev pom zoo no hu ua Kev Tso Cai Siv Raws Kev Ti Tes Ti Taw.

Cov txiaj ntsim uas ntxim muaj tau ntawm remdesivir

Remdesivir kuj yuav pab tau koj zoo sai dua yog tias koj muaj mob COVID-19. Nws kuj yuav tuaj yeem txo nqis tau cov kab mob nyob hauv koj lub cev. Nyob rau kev tshawb fawb, cov neeg mob uas tau txais remdesivir tau zoo los ntawm lawv tus mob sai dua. Nyob rau ib qho kev tshawb fawb, lub ncuaj sij hawm xam qhov nruab nrab ntawm tus mob yuav ploj mus los ntawm 15 hnuv nqis mus rau 11 hnuv. Remdesivir kuj yuav pab cov neeg mob nyob rau txhua theem ntawm COVID-19. Nws kuj tseem yuav txo nqis kev pheej hmoo rau kev tuag los ntawm COVID-19 yog tias cov neeg mob tau txais qhov tshuaj ntxov rau lawv tus mob, ua ntej lawv yuav muaj teeb meem kev ua pa los ntawm lawv tus kheej thiab thaum yuav tau siv cuab yeej pab ua pa.

Cov kev pheej hmoo uas ntxim muaj ntawm remdesivir

Thaum remdesivir tab tom raug tshawb fawb, nws kuj yuav muaj tau hais tias peb tseem tsis tau paub txog txhua yam ntawm kev ua rau muaj mob lwm yam tuaj. Li cas los xij, muaj coob leej ntau tus nyob rau cov kev sim kho, thiab cov neeg nyob rau hauv Minnesota, tau raug kho nrog remdesivir. Tej kev ua rau muaj mob lwm yam ntau tshaj plaws uas tau tshaj qhia hauv cov kev tshawb fawb yog mob taub hau, kiv taub hau, theem potassium qis, eesxais ntawm lub siab tsis thooj ib txwm, lossis kev ua haujlwm ntawm lub raum zoo tsis thooj ib txwm. Nws kuj yuav muaj tau rau qhov yuav muaj kev sib tiv tsis sib haum rau ib hom tshuaj kho mob twg, uas kuj yuav ua rau ntshav ntoj qis, ua rau koj tej di ncauj lossis ntsej muag o tuaj. Sij hawm no, cov txiaj ntsim zoo ntawm remdesivir tshwm muaj ntau dua qhov kev pheej hmoo ntawm tej kev ua rau muaj

mob lwm yam, tab sis koj tus kws kho mob yuav ua twb zoo soj ntsuam koj thaum uas koj tseem nyob rau qhov kev kho mob.

Xov xwm ntau ntxiv

Nug koj tus kws kho mob kom paub txog xov xwm ntau ntxiv hais txog remdesivir. FDA muaj ib cov ntaub ntauv qhia txhij txhua rau cov neeg mob uas muaj xov xwm ntau ntxiv hais txog qhov kev kho mob ntawd. Koj tuaj yeem thov koj qhov chaw kho mob txog ntawm cov ntaub ntauv FDA. Txoj kev xaiv ntawm kev kho mob yog nce rau ntawm koj xwb thiab koj kuj tuaj yeem tso tseg kev kho mob nyob rau txhua lub sij hawm yog tias koj xav tau.

Kev muab tshuaj remdesivir hauv Minnesota

Minnesota tau txais cov kev xa tshuaj remdesivir tuaj ntawm tsoom fwm Meskas txhua lub lim tiam raws cov neeg nyob rau hauv tsev kho uas muaj mob COVID-19. Cov tsev kho mob thoob xeev tuaj yeem muas tau remdesivir thiab Rooj Tsav Xwm Saib Xyuas Kev Noj Qab Haus Huv hauv Minnesota tuaj yeem pab cov tsev kho mob kom tau txais remdesivir, yog tias tsim nyog. Cov kev txiav txim siab txog kev kho mob nrog tshuaj remdesivir yog nyob ntawm qhov uas koj heev npaum li cas; nws tsis yog hais raws hnuv nyoog, haiv neeg, pawg neeg me, kev ntseeg, kev xiam oob qhab, nyiaj tuav pov hwm, kev yog thiab tsis yog pej xeeb huab hwm, lossis lwm yam.

Yuav ua li cas mus ntxiv

- Nug koj tus kws kho mob hais txog tag nrho koj cov kev xaiv ntawm kev kho mob, xam nrog remdesivir.
- Qhia rau koj tus kws kho mob txog txhua yam tshuaj uas koj tab tom noj ziag no.
- Xaiv ib tug twg uas tuaj yeem pab tau koj txiav txim siab txog kev kho mob thiab tuaj yeem hais lus sawv cev rau koj yog tias koj tsis tuaj yeem hais tau rau koj tus kheej. Ua kom paub tseeb hais tias tus neeg ntawd paub txog qhov uas tseem ceeb rau koj.

Hais txog COVID-19

COVID-19 yog ib hom mob uas xeeb muaj los ntawm ib tug kab mob, uas sawv daws paub hais tias yog coronavirus, uas tseem tsis tau pom muaj nyob rau tib neeg dua los. Suav txij lub Kaum Ob Hlis xyoo 2019, tus kab mob no tau kis mus rau ntau lub teb chaws thoob ntiaj teb, xam muaj Teb Chaws Meskas tib si. Koj tuaj yeem tau txais kab mob COVID-19 los ntawm kev ua pa nqus tau tej feem uas muaj tus kab mob uas lwm tus neeg uas muaj tus kab mob ntawd tso pa tuaj. Qee leej neeg uas muaj kab mob COVID-19 tuaj yeem tsis muaj yam ntxwv mob li los muaj. Qee leej kuj muaj mob txhuj txhoo me me xwb, xws li ua npaws. COVID-19 kuj tseem tuaj yeem ua rau cov neeg mob txaus pw tsev kho mob lossis nyob rau tej qhov chaw kho mob uas yuav tau muab siab kho tiag tiag.



Minnesota Department of Health | health.mn.gov | 651-201-5000
625 Robert Street North PO Box 64975, St. Paul, MN 55164-0975

Tiv tauj rau health.communications@state.mn.us txhawm rau thov ua lwm tus qauv.

9/1/2020 (Hmong)